

Termoelektrana Stanari čija je izgradnja nedavno završena, počela je s probnim radom početkom januara ove godine. S obzirom da imaju svoj Rudnik lignita, TE će se direktno od njega i snabdijevati. Problem bi mogla imati TE Tuzla s obzirom na to da je značajne količine uglja nabavljala upravo iz ovog rudnika.

U 2014. i 2015. godini Rudnik Stanari isporučio je 450.000 tona uglja Elektroprivredi BiH (EP BiH), odnosno TE Tuzla, što je blizu polovine ukupne proizvodnje ovog rudnika. Iz Elektroprivrede BiH ističu kako je postignut dogovor o isporuci uglja sa RiTE Stanari za prva tri mjeseca u ukupnoj količini 150.000 tona. Trenutno se vrše pregovori o nastavku eventualne saradnje, istakli su iz EP BiH.

#### Nedovoljne količine

Građani su nerijetko postavljali pitanje zbog čega se kupuje ugalj iz drugih rudnika kada imamo na području FBiH rudnike kojima je upravo potrebna takva vrste "injekcije" kako bi napredovali. Prema navodima Službe za komunikacije JP EP BiH, u prethodnom periodu rudnici uglavnom nisu mogli zadovoljiti planiranu proizvodnju električne energije, te su se pronalazile mogućnosti kupovine nedostajućih količina iz rudnika koji nisu u sastavu Koncerna.

"Prilikom izrade elektroenergetskog bilansa određuje se potrebna i moguća proizvodnja električne energije uvažavajući potrebe domaćih kupaca, te planiranje određenih viškova električne energije koja se prodaje na tržištu, a s ciljem ispunjavanja planova preduzeća. Na osnovu planirane proizvodnje električne energije, plana remonta blokova termoelektrana, plana rada efikasnijih i ekonomičnijih blokova, izračunava se potreba za ugljem. Na osnovu te potrebe uputi se upit prema rudnicima iz sastava Koncerna s ciljem anketiranja istih, da li mogu svojom proizvodnjom zadovoljiti planiranu proizvodnju električne energije", kazali su nam iz ove Službe.

Najveće količine iz Stanara i Banovića.

Podsjetimo, u Koncernu su Rudnik Kreka, RMU Kakanj, Zenica, Breza, Đurđevik, Abid Lolić u Travniku i RU Gračanica.

"Najveće količine se kupuju od RMU Banovići, a na ovaj ugalj je i projektovan Blok 6 - 223 MW u TE Tuzla. Ukupne količine uglja koje se kupuju od RMU Banovići su više od 1.000.000 tona godišnje. Ostale količine uglja, prvenstveno lignita, JP Elektroprivreda BiH kupuje od RiTE Stanari, rudnika koji se nalazi u RS. Ovaj rudnik je jedini u okruženju koji ima lignit kvaliteta koji svojim karakteristikama u potpunosti odgovara lignitnim blokovima u TE Tuzla", navodi se u odgovoru Službe.

izvor: [www.klix.ba](http://www.klix.ba)